

CNS9273

R GB 30-05 00164 BB937

aab

(EMBARGO: Untuk siaran selepas jam 0001, 31 Mei)

Mahathir - China

HUBUNGAN MALAYSIA-CHINA CAPAI TAHAP BARU PERSEFAHAMAN DAN KERJASAMA

I

KUALA LUMPUR, 30 Mei (Bernama) -- Hubungan Malaysia dan China kini mencapai satu tahap baru persefahaman dan kerjasama, dan kedua-dua negara harus bangga dengan perkembangan itu, kata Datuk Seri Dr Mahathir Mohamad.

Katanya, dalam masa lima tahun kebelakangan ini, hubungan dua hala antara kedua-dua negara telah meningkat dengan begitu pesat dalam banyak bidang kerjasama.

"Saya percaya keadaan ini dapat diperkukuhkan lagi pada tahun-tahun akan datang," katanya dalam perutusan kepada Perdana Menteri China, Li Peng, sempena ulang tahun ke-20 pembentukan hubungan diplomatik antara China dan Malaysia, hari ini.

Kandungan perutusan itu dikeluarkan oleh Wisma Putra.

Hubungan rasmi antara kedua-dua negara telah dimeterai di Beijing pada 31 Mei 1974, antara Allahyarham Tun Abdul Razak, perdana menteri Malaysia ketika itu, dan mendiang Chou En-Lai, perdana menteri China pada masa itu.

-- Lagi

♥30/05/19-23MST

CNS9276

R GB 30-05 00176 BB938

aab

Mahathir - China 2 (Akhir) Kuala Lumpur (EMBARGO)

Dr Mahathir merakamkan sanjungan tinggi terhadap wawasan dan keberanian Tun Razak itu kerana Malaysia merupakan negara Asean pertama yang mengadakan hubungan dengan China.

"Saya rasa pujian bagi pewujudan hubungan erat antara Malaysia dan China ini patut diberi kepada kepimpinan China yang pragmatik dan berpandangan jauh," kata Dr Mahathir.

Beliau berkata dasar hubungan berbaik-baik dengan negara-negara jiran telah membawa kepada perkembangan positif dalam hubungan dua hala terutama pada tahun-tahun kebelakangan ini.

Dr Mahathir berkata Malaysia dan China boleh berbangga dengan perkembangan yang memuaskan ini sejak dua dekad yang lepas. Sejarah hubungan antara kedua-dua negara sebenarnya telah terjalin sejak sekian lama.

Selain peningkatan pesat kerjasama dalam bidang ekonomi, perdagangan dan pelaburan, Dr Mahathir berkata kerjasama dalam bidang-bidang lain seperti pelancongan, pertukaran kebudayaan dan hubungan antara rakyat dan rakyat akan meningkatkan lagi persefahaman dan persahabatan.

Menteri Luar, Datuk Abdullah Ahmad Badawi juga menghantar perutusan yang serupa kepada rakan sejawatan beliau, Qian Qichen. -- Bernama.

TCL OA

♥30/05/19-24MST